

**Wednesday, April 22, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**AMC POLLING DAY**

Mizoram State Election Commissioner Dr. H. Lalthlangliana chuan duhthusam ang thlap ni lo mah se AMC a vote tla zat zaa 62.77 chu a tha thawkhat a ti.

Akashvani News Aizawl zawhna chhangin Mizoram State Election Commissioner Dr. H. Lalthlangliana chuan Home Voting te nen an belhkhawm hnuah, vote tla zat chu zaa 62.77 a ni tih a sawi a, tun tumah hian Election Commission of India hnuai Duty vangin sipai tam tak an zin chhuak a, anni tan hian Postal Ballot a vote thlak theih a ni si lo a, hei hi vote thlak lo an tam chhan niin a sawi a, AMC chu ECI nen an inzawm loh avangin Postal Ballot hi sipai tan hman theih a ni lo tih a sawi bawk.

Dr H. Lalthlangliana chuan, nimina vote thlak lai khan Aizawl khawpui hmun hrang hrang an tlawh kual a, an beisei phak bakin Mizoram People Forum (MPF) puihna an dawng tha a, anni zarah boruak muanawm tak hnuai hian inthlan a ni, a ti.

(Byte: Dr. H. Lalthlangliana)

Dr. H. Lalthlangliana chuan karleh ni 27 ah vote chhiar hun pawh fan anih chhan chu Mizorama kohhran lian ber Presbyterian Kohhran Bial Inkhawmpui tibuai lo tua ruahman a ni tih a sawi a, tun kar tawpa Bial Inkhawmpui a zawh chuan kohhran ti buai loin vote an chhiar thei dawn niin a sawi bawk a ni.

Nimina Aizawl Municipal Corporation (AMC) inthlan ah vote za zela 62.77% a tla a. nimina polling station a vote tla zawng zawng zat chu za zela 61.14 % niin Home Voting leh PED vote thlak nen a vaiin za zela 62.77 % vote a tla a ni.

Aizawl Municipal Corporation inthlan hi AMC inthlan vawi 3 lo neih tawh te nena khaikhinin tun tuma inthlanah hian vote a tla tlem ber a, kum 2010 khan vote zaa 63.60% tla in kum 2015 khan zaa 63.55% vote a tla thung a, kum 2021 ah vote zaa 64.19% tla in tun tumah hian 62.77% a tla a ni.



**POL PARTIES**

Aizawl Municipal Corporation Inthlan vote thlak tluang takin neih zawh a ni ta chu lawmawm an tih thu MNF leh MPCC chuan thuchhuah siamin an sawi a.

MNF Party chuan Inthlana Vote tla tlem erawh a pawh an ti tih sawiin democracy rama mipuiin an duhna an lantirna kawnga thawkchhuak an tlem chu Inthlanna buaipuitu Sawrkar hlawhchhamna kawng khatah an ngai an ti a. Mipui hriat tur puanzarna leh inzirtirna kawnga tih tur tih tawkloh vang a ni an ti a,

MNF Party chuan Vote nei tura inngai, AMC E-Roll 2026-a awmlo, Vote thlak tura kal hawihai ta engemawzatan awm an ti a, Vote thlaktute zinga zaa 50 chung lamte thlanchhuah chauhin Aizawl khawpui enkawl hna an thawk tur chu duhthusamin a kal a kimlo hle ah an ngai an ti.

Venhimna lam thawktu, State danga duty mek mi tamtak vote thlak thei lova siam an ni chu pawian ti tih an sawi bawk a, rim taka ram himna atana thawktute dikna chanvo rahbehna leh Democracy kalphung zahlohna ah an ngai a, hetiang hi thleng nawn tawhlo se an duh tih an sawi.

MPCC chuan Kumin 2026 AMC inthlanah hian Aizawl veng tinah nasa takin Congress Party kaihthawh a ni a, mi tam takin Congress-ah beiseina thar neiin an party an zawm an ti a, Inthlan buatsaihtu State Election Commission leh thawktu zawng zawngte, Mizoram People's Forum (MPF) chungah leh thahnemngai taka vote thlaktute zawng zawng chungah te MPCC chuan lawmthu kan sawi takzet a ni.

Congress Thalai chuan ward thenkhatah MPF in a khak ngai hial khawpa dan palzutna a thleng ni a sawiin pawian ti a, thleng zui tawh lo se an tih thu an sawi bawk.



## **ZPM**

ZPM President Pu Lalliansawta chu taksa lam harsatna avangin a chawlh rih dawn a, President charge hi ZPM Leader, Chief Minister Pu Lalduhoman a la rih dawn tih wawiina an party thuchhuah chuan a sawi a ni.



## **ATL ROAD**

ATL Road 5.5m a zau a siam that tur, Pukpui dai atanga Mausem dai thleng chu MJA Lunglei chuan tukin zing khan a siam that dan an en a, he kawng hi SLT Infracon Pvt. Ltd Hailakandi ten an thawk a ni.

Pukpui atanga Tlawng Bridge thleng km 8.15m a thui hi PWD Road Div-I chuan a enkawl a, Tlawng atanga Kanghmun 'S' thleng hi PWD Road Div-II chuan a enkawl thung a ni.

